

NEWSLETTER

OLIMPIJSKOG KOMITETA BiH



No. 23, mart/april 2024



Poštovani sportisti i sportski radnici,

Poštovani prijatelji,

Ostalo je manje od 80 dana do početka Olimpijskih igara 2024 u Parizu, kada će cijela sportska javnost iz 206 olimpijskih komiteta, stremiti ka ostvarenju vrhunskih sportskih rezultata. Pripreme olimpijskog tima OK BiH su u punom toku, te očekujemo učešće 7-8 sportista uz pratnju istog broja trenera u 4-5 sportova.

Olimpijski komitet BiH implementira ovaj projekat već četiri godine, kroz osiguravanje stipendija i kompletne logističke podrške, te za nas OI Pariz 2024 mogu početi.

OK BiH u ovom trenutku, pored OI Pariz 2024, realizuje 24 projekta Olimpijske solidarnosti i 5 projekata putem fonda Evropske unije, a sve u cilju jačanja sportskog sistema BiH.

Olimpijski komitet BiH, sportski savezi BiH i najuspješniji bh. sportisti započeli su i kampanju „Glas sportista“, koja je u toku i ima za cilj da potakne na promjene institucije i nadležna ministarstva na svim nivoima vlasti, kako bi se vrhunski sport, vrhunski sportisti i olimpijci, te reprezentativne selekcije Bosne i Hercegovine konačno počele sistemski finansirati i tretirati kako zaslužuju. Iako se naziru prvi pozitivni pomaci, OK BiH neće odustati od zahtjeva vrhunskih sportista i sportskih saveza do konačnog i potpunog rješenja gorućih problema bh. sporta.

Takođe želimo najaviti nadolazeće aktivnosti koje će OK BiH realizovati krajem mjeseca maja, a to su “Seminar sportske medicine 2024” koji će se održati u Olimpijskom komitetu BiH i “Olympic Day” koji će se održati u Zavidovićima u saradnji sa Golf savezom BiH, Golf klubom Krivaja i Forest Creek Golf resortom. Održavanje Olympic Day-a će ujedno biti i uvertira za finalnu press konferenciju predstavljanja Olimpijskog tima BiH za odlazak na OI Pariz 2024.

Našim olimpijcima, trenerima, savezima i njihovim porodicama, želimo mnogo uspjeha na predstojećim Olimpijskim igrama u Parizu uz nadu da će biti historijske.

Uz sportski pozdrav iz OK BiH,

Prof. dr Izet Rađo, akademik
Predsjednik OK BiH

ODRŽANA 5. GENERALNA SKUPŠTINA OLIMPIJSKOG KOMITETA BiH

Jednoglasno usvojeni svi izvještaji uz mnoštvo komplimenata za rad OK BiH prisutnih delegata iz 41 sportskog saveza BiH.



U Olimpijskom komitetu Bosne i Hercegovine 21.03.2024. godine održana je 5. redovna Generalna skupština Olimpijskog komiteta BiH uz prisustvo delegata koji dolaze iz 41 sportskog saveza Bosne i Hercegovine. Sjednicom je predsjedavao predsjednik OK BiH akademik, prof. dr Izet Rađo.

Izvještaj Nadzornog odbora OK BiH je prezentirao Tomislav Cvitanušić, Izvještaj o radu za 2023. godinu potpredsjednik prof. dr Milanko Mučibabić, Finansijski izvještaj za 2023. godinu i Finansijski plan za 2024. godinu prezentirao je predsjednik OK BiH akademik prof. dr Izet Rađo, dok je Plan rada OK BiH za 2024. godinu prezentirao potpredsjednik OK BiH Marijan Kvesić.

Delegati Generalne skupštine su jednoglasno usvojili sve prezentirane izvještaje.





Nakon 23 – minutnog filma u kojem su ukratko prezentirane sve aktivnosti OK BiH u 2023. godini, delegati i gosti su uputili mnoštvo pohvala za obim i kvalitet aktivnosti, plodonosan i harmoničan rad Olimpijskog komiteta BiH sa fokusom na vrhunski sport i sportiste.

Osim izvještaja koje su usvojili, delegati su iskazali jasan stav i odlučnost da se nastavi kampanja sistemskog finansiranja vrhunskog sporta koja je usmjerena ka ministarstvima nadležnim za finansiranje sporta, ali i da se nastavi podrška najboljih sportista BiH, pogotovo onih koji se spremaju za OI Pariz 2024, sa jednim jedinstvenim ciljem da se ostvare najbolji rezultati na OI do sada.

Generalna skupština OK BiH je završena zajedničkom fotografijom pri čemu su svi delegati obukli “retro” trenerke iz vremena ZOI Sarajevo ‘84 kako bi se na simboličan način prisjetili slavni dana bh. sporta u prošlosti, ali i nagovijestili nastavak vrhunskih rezultata i svijetlu budućnost za bh. sport.



INTERVJU PREDsjedNIKA OK BIH, AKADEMIKA, PROF. DR IZETA RAĐE



Guest emisije “Sport intervju” koja je emitovana 4. marta, BH Radiju 1, bio je predsjednik OK BiH akademik prof. dr. Izet Rađo.

Razgovor o aktivnostima i projektima OK BiH, uspjesima bh. sportista, Olimpijskim igrama 2024, kao i o gorućoj temi finansiranja vrhunskog sporta, vodio je novinar Sportskog programa BH Radija 1, Sandro Limić.

Ovaj iznimno zanimljiv intervju Predsjednika OK BiH, poslušajte na linku [OVDJE](#).

OK BIH POTPISAO MEMORANDUM O RAZUMIJEVANJU SA INTERNACIONALNOM AKADEMIJOM NAUKA I UMJETNOSTI U BIH



U prostorijama Olimpijskog komiteta Bosne i Hercegovine, predsjednik OK BiH akademik prof. dr Izet Rađo i predsjednik Internacionalne akademije nauka i umjetnosti u BiH akademik prof. dr Asim Kurjak, potpisali su Memorandum o razumijevanju.

Svrha ovog Memoranduma je uspostavljanje saradnje OK BiH i IANUBIH u oblasti naučno-istraživačkog rada. Potpisnici će zajednički nastupati prema međunarodnim i drugim raspoloživim projektima, sa ciljem da se obezbijede sredstva za naučno-istraživačke projekte, te dinamizira rad na poboljšanju i unaprjeđenju primjene savremenih tehnologija i inovacija.

Objе strane će zajedno učestvovati na aktivnostima, konferencijama, radionicama i slično, koje su od obostranog interesa, a sve u cilju jačanja zajedničke saradnje.

OK BiH u posjeti Federalnom Ministarstvu kulture i športa



Predstavnici Olimpijskog komiteta BiH, predsjednik OK BiH akademik prof. dr Izet Rađo i generalni sekretar doc. dr Said Fazlagić posjetili su ministricu kulture i športa FBiH Sanju Vlaisavljević i pomoćnika ministricu u Sektoru za sport, Adnana Džindu.

Ovom prilikom su predstavnike Ministarstva upoznali sa prethodno realizovanim aktivnostima i kontinuiranim projektima podrške sportistima, trenerima, unapređenju menadžmenta i promocije olimpijskih vrijednosti, kao i planovima OK BiH u narednom periodu.

Predsjednik OK BiH akademik prof. dr Izet Rađo iskoristio je priliku da Ministricu informiše i o godišnjim prihodima OK BiH, kao i o načinu na koji se finansiraju najbolji bosanskohercegovački sportisti i projekti, a sve s ciljem transparentnog informisanja kako Ministarstva tako i javnosti. Većinu sredstava OK BiH obezbjeđuje kroz projekte, koji se najvećim dijelom usmjeravaju ka vrhunskim sportistima i savezima, i to preko 60% tih sredstava.

Predsjednik Olimpijskog komiteta BiH, akademik, prof. dr Izet Rađo se zahvaljuje za kontinuiranu podršku Federalnog ministarstva kulture i športa, kao i za topli prijem u prostorijama Ministarstva. Više o posjeti pročitajte [OVDJE](#).

OK BiH u posjeti Ministarstvu kulture i sporta Kantona Sarajevo

Predstavnici Olimpijskog komiteta BiH, predsjednik OK BiH akademik prof. dr Izet Rađo i generalni sekretar doc. dr Said Fazlagić posjetili su ministra Kantona kulture i sporta Kenana Magodu, te su tom prilikom vodili kvalitetan i plodonosan razgovor sa Ministrom i njegovim saradnicima.

Ministar Magoda je iskazao punu podršku radu Olimpijskog komiteta Bosne i Hercegovine te je dogovoren niz projekata koje će zajednički realizovati OK BiH i Ministarstvo kulture i sporta Kantona Sarajevo u kontekstu sporta i sportskog sistema Bosne i Hercegovine. Dogovoreno je i da se objedine resursi kako bi stvorili što bolje okruženje za vrhunske sportiste i olimpijce.



Posebno izdvajamo projekat podrške finalnim pripremama olimpijaca, evidentnih i potencijalnih kandidata za Olimpijske igre Pariz 2024.

U okviru projekta podrške olimpijci će imati permanentno praćenje i dijagnosticiranje njihove sportske forme koje će vršiti institut Verlab.

OK BIH NAGRADIO LANU PUDAR I NJEN TIM ZA OSVAJANJE SVJETSKE BRONZE SA 10.000,00 KM



Olimpijski komitet Bosne i Hercegovine kao nebudžetski korisnik, nastavlja podržavati najbolje bh sportiste i olimpijce.

Izvršni komitet Olimpijskog komiteta Bosne i Hercegovine je na svojoj 30. redovnoj sjednici održanoj 29.02.2024. godine razmatrao postignute rezultate, te je donesena odluka da se Lana Pudar i njen trenerski tim nagradi sa ukupno 10.000,00 KM. Još jednom čestitamo olimpijki Lani Pudar, porodici, njenom trenerskom timu i Plivačkom

savezu BiH na izvrsnim rezultatima krunisanim bronzanom medaljom na nedavno održanom Svjetskom prvenstvu u Dohi i želimo im mnogo sreće u nastavku sezone.

OK BIH NAGRADIO ELVEDINU MUZAFERIJU ZA POSTIGNUTE REZULTATE I UVRSTIO JE U PROGRAM+ OK BIH SA 10.000 KM



Izvršni komitet Olimpijskog komiteta Bosne i Hercegovine je razmatrao postignute rezultate i donio odluku da sa 10.000,00 KM podrži pripreme i nastupe Elvedine Muzaferije u nastojanjima da ostvari što bolje rezultate u narednom periodu, a posebno na Zimskim olimpijskim igrama Milano Cortina 2026, te je uvrstio u Program+ OK BiH za najbolje sportiste BiH. Čestitamo Elvedini, porodici, njenom trenerskom timu, klubu i Skijaškom savezu BiH, te upućujemo iskrene čestitke na odličnim rezultatima koji su obradovali cjelokupnu bh.

sportsku zajednicu, ali i sve građane Bosne i Hercegovine.

PRIJEM ELVEDINE MUZAFERIJE U OLIMPIJSKOM KOMITETU BIH

U prostorijama OK BiH, predsjednik OK BiH akademik, prof. dr Izet Rađo i generalni sekretar doc. dr Said Fazlagić, ugostili su najbolju bh. skijašicu Elvedinu Muzaferiju, predsjednika Skijaškog saveza BiH, Samira Smajića i potpredsjednika Skijaškog saveza Bosne i Hercegovine, Borisa Lekića.



Predstavnici OK BiH su čestitali Elvedini na izvanrednim historijskim rezultatima koje je postigla u protekloj sezoni. Takođe, sastankom je intenzivirana i saradnja sa ciljem nastavka podrške u ostvarenju ciljeva na Olimpijskim igrama Milano Cortina 2026.

Elvedini još jednom upućujemo iskrene čestitke, njenom timu, kao i Skijaškom savezu Bosne i Hercegovine.

POTPREDsjedNIK OK BiH PROF. DR MILANKO MUČIBABIĆ PRISUSTVOVAO PRIJEMU AMBASADE GRČKE

U ponedjeljak 25. marta 2024. godine Ambasada Grčke u Bosni i Hercegovini organizovala je svečani prijem za visoke zvanike povodom Nacionalnog dana Republike Grčke. Prijem je održan u Umjetničkoj galeriji Bosne i Hercegovine, a ispred Olimpijskog komiteta BiH prisustvovao je potpredsjednik prof. dr Milanko Mučibabić.

Potpredsjednik OK BiH je iskoristio priliku da u razgovoru sa N.J.E. ambasadoricom Ioanna EFTHYMIADOU, u ime Olimpijske porodice Bosne i Hercegovine uputi čestitke povodom ovog značajnog dana za Republiku Grčku.



OK BiH U POSJETI GRADONAČELNIKU ZAVIDOVIĆA I GOLF KLUBU KRIVAJA



Izvršni komitet OK BiH je na 30. Sjednici, 24.01.2024. godine, donio odluku da se ovogodišnji Olimpijski dan održi u Zavidovićima u saradnji sa: Golf savezom BiH, Golf klubom Krivaja i Forest Creek Golf resortom.

Delegacija OK BiH na čelu sa Generalnim sekretarom, doc. dr Saidom Fazlagićem je posjetila gradonačelnika Zavidovića, gospodina Hašima Mujanovića,

člana Upravnog odbora Golf saveza BiH, Harisa Mujanovića i generalnog sekretara Golf kluba Krivaja, Adnana Šabanovića.

Predstavnici prethodno navedenih institucija i organizacija su održali prvi sastanak, s ciljem definisanja organizacionih aktivnosti za realizaciju manifestacije, kojom svake godine proslavljamo Olimpizam u BiH i svijetu, te promoviramo olimpijske vrijednosti.

ODRŽAN SASTANAK POVODOM ORGANIZACIJE “OLYMPIC DAY-A” U ZAVIDOVIĆIMA



Povodom organizacije predstojećeg Olimpijskog dana, predstavnici OK BiH, generalni sekretar doc. dr Said Fazlagić i viši stručni saradnik za sport, međunarodne odnose i projekte, doc. dr Dejana Planinčić, održali su zvanični sastanak sa domaćinom Golf kluba Krivaja, sportskim direktorom Adnanom Šabanovićem. Sastanku su takođe prisustvovali, ispred Gradske uprave Zavidovića, pomoćnik

gradonačelnika Idriz Alihodžić, te moderator manifestacije “Olympic day”, Haris Galijašević. Predstavnici OK BiH su upoznali sportske radnike Zavidovića sa cjelokupnom organizacijom ove svjetski poznate manifestacije, na kojoj se očekuje učešće oko 120 dječaka i djevojčica na kojoj će biti promovisano deset sportova.

ODRŽAN SASTANAK IZMEĐU HIFA-PETROL D.O.O. I OLIMPIJSKOG KOMITETA BIH



Nakon potpisanog Memoranduma o razumijevanju u oblasti razvoja, promocije sporta i podrške sportistima između HIFA-PETROL d.o.o. i Olimpijskog komiteta BiH, nastavljeni su razgovori o proširenju saradnje.

Predsjednik OK BiH akademik prof. dr. Izet Rađo, generalni sekretar OK BiH doc. dr Said Fazlagić i zastupnik Hifa petrol d.o.o., Ahmed Ahmetlić obavili su konstruktivan sastanak o implementaciji novih modela podrške razvoju bh. sporta, promociji olimpijskih vrijednosti, vrhunskom sportu i sportistima, kao i promociji uspješnih bh. kompanija.

Društveno-odgovorna kompanija HIFA-PETROL d.o.o. godinama unazad promoviše najbolje bh. sportiste i olimpijce među kojima su Amel Tuka, Mesud Pezer, Lana Pudar i Iman Avdić. Prethodnih godina, zaštitna lica Hifa Petrola bili su i sportisti Damir Džumhur i Sanjin Pehlivanović.

HIFA-PETROL d.o.o će pružati finansijsku podršku za različite sportske projekte i događaje, kao i podršku za razvoj sportista. Cilj saradnje je jačati sportsku infrastrukturu i promociju sportske kulture u BiH.

BH. ATLETIČAR ABEDIN MUJEZINOVIĆ, OLIMPIJSKOM KOMITETU BIH I HIFA PETROL UPUTIO PISMO ZAHVALE



Na adresu OK BiH stiglo je pismo zahvale bh. atletičara Abedina Mujezinovića.

Abedin je stipendista Olimpijskog komiteta BiH i kako navodi u pismu, zahvaljujući obezbijedenim finansijskim sredstvima, kroz trenažni proces i takmičenja prolazio je bez dodatnog pritiska i brige o finansijskim pitanjima. Olakšan je pristup kvalitetnijoj sportskoj opremi, stručnom trenerstvu i svim ostalim resursima koji su neophodni za postizanje vrhunskih rezultata.

Ističe i činjenicu kako mu je ova finansijska podrška, pružila priliku da se takmiči i na nacionalnom i međunarodnom nivou, te da predstavlja Bosnu i Hercegovinu i postigne značajne rezultate.

Iako je bh. atletičar stipendista OK BiH, dodatnu podršku u ostvarenju snova za plasmanom na Olimpijske igre 2024 u Parizu omogućili su i čelnici društveno odgovorne kompanije Hifa Petrol d.o.o. Pismo zahvale Abedina Mujezinovića pročitajte [OVDJE](#).

LANA PUDAR I NEMANJA BILBIJA PROGLAŠENI NAJBOLJIM SPORTISTIMA GRADA MOSTARA ZA 2023. GODINU



U utorak 26.03.2024. godine u organizaciji Sportskog saveza grada Mostara, održan je izbor sportiste za 2023. godinu.

Svečanost proglašenja najboljih sportista/sportistkinja Grada Mostara, otvorio je predsjednik sportskog saveza prof. dr Ekrem Čolakhodžić. Odlukom Stručnog žirija, kojim je predsjedavao Enver Marić, legenda bh. nogometa, najboljom sportistkinjom Grada Mostara za 2023. godinu, proglašena je najbolja bh. plivačica Lana Pudar, dok je za najboljeg sportistu proglašen fudbaler mostarskog Zrinjskog Nemanja Bilbija.

Lana i Nemanja su izrazili zadovoljstvo postignutim rezultatima i veliku zahvalnost za osvojene nagrade, uz nadu da će njihov rad donijeti nove uspjehe koji će učiniti građane Mostara i cijele Bosne i Hercegovine, sretnim i ponosnim.

Među prisutnim zvanicama su bili i predstavnici OK BiH na čelu sa predsjednikom akademikom, prof. dr Izetom Rađom i generalnim sekretarom doc. dr Saidom Fazlagićem.

Svečanosti su prisustvovali i skupu se obratili Federalna ministrica kulture i športa, Sanja Vlasisavljević, gradonačelnik Grada Mostara, Mario Kordić kao i predsjednik Gradskog vijeća Grada Mostara, Salem Marić.

Čestitamo Lani, Nemanji, svim nagrađenim sportistima i sportistkinjama i želimo im mnogo uspjeha.

USPJEŠNO REALIZOVAN PROJEKAT "EARTH DAY - EARTH SWIM"



Foto izvor: Aleksandar Čavić

Od 16. do 22. aprila u Banja Luci je uspješno finaliziran projekat "Earth Day - Earth Swim".

Projekat je realizovan u saradnji sa PK "APK 22. April" uz podršku Plivačkog saveza BiH i specijalno partnerstvo Olimpijskog komiteta BiH putem fonda Olimpijske solidarnosti.

Nezaboravna sedmica je iza preko 200 mališana koji su imali priliku družiti se, učiti o benefitima sporta i plivati sa našom olimpijkom Lanom Pudar.

Potpredsjednik OK BiH, prof. dr Milanko Mučibabić je posjetio školu plivanja, te mališanima zaželio mnogo sreće u narednim danima i njihovim budućim sportskim opredjeljenjima.

U sklopu projekta je održana i edukativna radionica o važnosti uticaja Klimatskih promjena na sport i život općenito. Radionica koja je imala za cilj naučiti mališane i mlade ljude o važnosti očuvanja životne sredine održana je na Fakultetu fizičkog vaspitanja i sporta, Univerziteta u Banja Luci, čime je obilježen i dan Planete Zemlje. Edukativnoj radionici je prisustvovao veliki broj djece iz osnovnih škola, PK "APK 22. April", kao i studenti Fakulteta sporta, Filozofskog fakulteta i Pedagoškog fakulteta.

Zahvaljujući Olimpijskoj solidarnosti i Erasmus+ projektu "OCEAN", ovakve radionice će se nastaviti širom Bosne i Hercegovine.

KAMPANJA • GLAS SPORTISTA

...ZA RJEŠAVANJE SISTEMSKOG FINANSIRANJA VRHUNSKOG SPORTA BIH!

Javnost sa izuzetnom pažnjom prati kampanju "Glas sportista" u kojem OK BiH promovira višegodišnju inicijativu o konačnom rješavanju sistemskog finansiranja vrhunskog sporta Bosne i Hercegovine od strane nadležnih institucija BiH.

Nakon objavljenih video poruka vrhunskih sportista i olimpijaca video poruke je pogledalo skoro pola miliona ljudi.

Nadamo se da su ove poruke pogledali i donosioci odluka za sistemsko finansiranje sporta, te da će poduzeti relevantne korake u skladu sa zahtjevima sa Okruglog stola OK BiH i porukama vrhunskih sportista.

Poslušajte poruke naših vrhunskih sportista klikom na fotografiju i pratite predstojeće objave u nastavku kampanje "Glas sportista".



SPORTSKI SAVEZI BOSNE I HERCEGOVINE

OK BIH | ODRŽAN SASTANAK SA PREDSJEDNIKOM EVROPSKE ODBOJKAŠKE KONFEDERACIJE (CEV) I OS BIH



U prostorijama OK BiH, predsjednik OK BiH akademik, prof. dr Izet Rađo i generalni sekretar OK BiH doc. dr Said Fazlagić, ugostili predsjednika Evropske odbojkaške konfederacije (CEV), gospodina Aleksandra Boričića, predsjednika Odbojkaškog saveza BiH, Milutina Popovića i člana Upravnog odbora OS BiH, Mirsada Kadrića sa kojima su održali radni sastanak čija tema je bila analiza stanja u odbojkaškom sportu i

reprezentativnim selekcijama, te poboljšanje finansiranja aktivnosti Odbojkaškog saveza BiH.

Ovom prilikom predsjednik OK BiH, akademik prof. dr Izet Rađo je izrazio podršku Odbojkaškom savezu BiH da kroz projekte Olimpijskog komiteta BiH, Olimpijske solidarnosti i druge dostupne projekte, apliciraju za dodatna sredstva koja će doprinijeti boljim uslovima i rezultatima reprezentativnih selekcija OS BiH. Predsjednik Evropske odbojkaške konfederacije (CEV), gospodin Aleksandar Boričić pohvalio je uspješno realizovan sastanak, izrazio zadovoljstvo prisustvom i iskoristio priliku da pohvali rad Olimpijskog komiteta BiH.

PRIJEM DELEGACIJE STONOTENISKOG SAVEZA BIH



U prostorijama OK BiH održan je radni sastanak sa predstavnicima Stonoteniskog saveza BiH (STS BiH).

U ulozi domaćina ispred OK BiH, delegaciju Stonoteniskog saveza BiH, ugostili su predsjednik OK BiH akademik, prof. dr Izet Rađo i generalni sekretar OK BiH, doc. dr Said Fazlagić.

Delegaciju STS BiH su predstavljali predsjednik STS BiH, Mirsad Pajević, direktor reprezentacije Anes Alić i generalni sekretar, Amela Mujezinović.

Tema radnog sastanka je domaćinstvo Evropskih kvalifikacija za Ol Pariz u organizaciji Stonoteniskog saveza BiH koje će se održati od 15. do 19. maja 2024. godine, u Areni hotela Hills. Više na [ovom linku](#).

ODRŽANA USPJEŠNA MEDIJACIJA POD VODSTVOM OK BIH



U martu mjesecu u prostorijama OK BiH održan sastanak sa predstavnicima Biciklističkog saveza BiH na temu „Rješavanje problematike funkcionisanja državnog saveza“.

Sastanak su predvodili predsjednik OK BiH akademik, prof. dr Izet Rađo, potpredsjednik prof. dr Milanko Mučibabić i generalni sekretar doc. dr Said Fazlagić, a predstavnici iz Biciklističkog saveza koji su prisustvovali i učestvovali u medijaciji bili su Toni Zorić, Biljana Krtalić, Emir Vučijak, Tihomir Kuvalja, Dejan Erešić i Goran Guska.

Cilj sastanka je nastavak dobrog funkcionisanja Biciklističkog saveza BiH, kojem je Olimpijski komitet BiH uveliko doprinio kroz ovaj medijacijski sastanak.

Nakon trosatnog sastanka, uspješno su dogovoreni zaključci na radost Biciklističkog saveza FBiH i Republike Srpske, odnosno Biciklističkog saveza BiH. Sportisti i funkcionalni državni savezi su osnovni prioritet OK BiH, jer jedino zajedno možemo stvarati pozitivne promjene i ojačati sportski sistem u BiH.

PREDSJEDNIK BADMINTON SAVEZA BIH U POSJETI OK BIH



U prostorijama OK BiH predsjednik Olimpijskog komiteta BiH akademik, prof.dr Izet Rađo ugostio je predsjednika Badminton saveza BiH g-dina Braneta Srdića.

Na održanom sastanku, predsjednici su razgovarali o aktivnostima, projektima i djelovanju Badminton saveza BiH, kao i o budućim planovima.

Ovom prilikom, predsjednik OK BiH akademik, prof.dr Izet Rađo je istakao kako je Badminton savez BiH, jedna od kvalitetnijih članica Olimpijskog komiteta BiH.

PROF. DR BRANISLAV CRNOGORAC DOBITNIK PRIZNANJA “ORDEN ZASLUGE” ZA RAZVOJ EVROPSKOG I BIH DŽUDO



Na zvaničnom Evropskom prvenstvu za seniore koje je održano u Zagrebu, prof. dr Branislavu Crnogorcu, članu IK OK BiH, uručeno je laskavo priznanje “Orden zasluge” za razvoj evropskog BiH džudoa.

Ceremoniji su prisustvovali predsjednik OK BiH, akademik prof. dr Izet Rađo i potpredsjednik prof. dr Milanko Mučibabić, koji su bili gosti predsjednika Evropske džudo unije (EJU) dr. Laszla Totha i člana Evropskog džudo odbora, gospodina dr Ivana Todorova. OK BiH upućuje iskrene čestitke prof. dr Branislavu Crnogorcu na osvojenom priznanju.

OK BIH URUČIO PLAKETU HS BIH ZA RAZVOJ SPORTA U BIH



Predsjednik akademik, prof. dr Izet Rađo i potpredsjednici prof. dr Milanko Mučibabić i Marijan Kvesić, u gostili su predsjednika Hokejaškog saveza BiH, gospodina Adnana Korića.

Povod ovog susreta je ekspanzija i razvoj hokejaškog sporta u BiH u muškoj i ženskoj konkurenciji, organizacija međunarodnih turnira i takmičenja u BiH, kao i odlični rezultati hokejaške reprezentacije BiH i Hokejaškog saveza BiH.

U okviru obilježavanja 40. godišnjice od održavanja ZOI '84, Hokejaški savez BiH je organizovao nekoliko takmičenja, te je gospodinu Koriću na temelju svega urađenog uručena plaketa.

Hokejaški savez BiH je u posljednje dvije godine bio domaćin i organizator dva Svjetska prvenstva pod ingerencijom IHF-a, dok je reprezentacija BiH ostvarila izvanredne rezultate. Više na linku [OVDJE](#).

ODRŽANO CHEERLEADING PRVENSTVO BOSNE I HERCEGOVINE



Krajem marta mjeseca u sportskoj dvorani u Ljubuškom održano je Cheerleading prvenstvo Bosne i Hercegovine.

Svečanoj ceremoniji otvaranja Cheerleading prvenstva, prisustvovala je i delegacija OK BiH na čelu sa generalnim sekretarom doc. dr Saidom Fazlagićem i članom Izvršnog odbora OK BiH, gospodinom Ivanom Brkićem.

Na Prvenstvu su učestvovali klubovi iz 8 bh. gradova, sa preko 500 sportista i sportistkinja. Učešće u ovom Prvenstvu imali su i sportisti sa posebnim potrebama, promovišući olimpizam i olimpijske vrijednosti.

Predstavnici OK BiH su pohvalili odličnu organizaciju Prvenstva za koju je zaslužan Cheerleading savez BiH predvođen predsjednicom Nikolinom Čolak.



USPJEŠNO REALIZOVAN PROJEKAT OLIMPIJSKE SOLIDARNOSTI – “INTERNATIONAL BIATHLON UNION COACH ACADEMY”



Olimpijski komitet BiH je na prijedlog Skijaškog saveza BiH, prijavio Bojana Minića i Stefana Lopatića na kurs Olimpijske solidarnosti (MOK) - “IBU Coach Academy”.

U proteklih godinu dana, kandidati su u okviru programa “IBU Coach Academy”, koja je organizovana u Republici Austriji (maj 2023. godine), Švedskoj (oktobar 2023. godine) i Poljskoj (mart 2024. godine) imali praktičnu i teoretsku nastavu s ciljem usvajanja novih trenerskih znanja i vještina. Cilj ovog kursa za biatlon je dodatna edukacija, poboljšanje trenerskih performansi i procesa, koje će direktno

utjecati na efikasnost trenažnog procesa bivših i sadašnjih olimpijaca. Zahvaljujući uspješno završenom prvom nivou edukacije, kandidati ispunjavaju uslove za edukaciju drugog nivoa koja je na rasporedu IBU-a od mjeseca maja tekuće godine. Čestitamo kandidatima!

ELMIR ĆERIMAGIĆ USPJEŠNO ZAVRŠIO EDUKATIVNI PROGRAM “ICECP”

Olimpijski komitet BiH je na prijedlog Atletskog saveza BiH, prijavio Elmira Ćerimagića na International Coaching Enrichment Certificate Program (ICECP) koji se održava u organizaciji MOK-a.


U sklopu ovog programa, Elmir Ćerimagić je boravio u Lozani, gdje je pred komisijom formiranom od strane MOK-a, prezentovao projekat pod nazivom “Renesansa atletike u BiH”.

Ćerimagić je kroz ovaj projekat učestvovao u četiri online modula i to u sljedećim oblastima: “Umjetnost i nauka treniranja”;

“Trenersko vodstvo i etički aspekti treniranja”; “Razvoj sportista”; “Psihologija sporta i mentalna priprema”; “Performance Nutrition”; “Fiziologija sporta i dizajn treninga”; “Biomehanika i sportska tehnologija i performanse i dobrobit sportista”.

Nakon online modula oputovao je u SAD, gdje se tokom trosedmičnog boravka, educirao na teoretskim i praktičnim vrijednostima u sportu, kao i na pisanju projekta “Renesansa atletike u BiH” sa svojim mentorom Dr. Randall L. Wilber.

Nakon povratka iz SAD-a, Elmir je počeo sa realizacijom projekta, koji je uspješno završio i 18. marta isti uspješno odbranio pred virtualnom porotom, a potom zvanično prezentovao pred komisijom MOK-a u Lozani 24.04.2024. godine. OK BiH upućuje iskrene čestitke Elmiru Ćerimagiću.



BH • TEAM

ELVEDINA MUZAFERIJA OKONČALA SEZONU NA 16. MJESTU U SVJETSKOM KUPU ZA SKIJAŠICE



Krajem mjeseca marta, najbolja bh. skijašica Elvedina Muzaferija je zabilježila nastup na posljednjoj spust utrci sezone u Svjetskom kupu za skijašice u austrijskom Saalbachu i iza sebe ostavila spektakularnu sezonu.

Elvedina nažalost nije uspjela završiti trku u Super G, ali je u utrci finala Svjetskog kupa u spustu, sa ostvarenim vremenom od 1:46.96, zauzela 16. mjesto. Nažalost, nije uspjela doći do dodatnih bodova koje osvaja 15 najboljih takmičarki.

Za pobjednicom je Elvedina kasnila 1,88 sekundi, te je sezonu završila kao 24. spustašica svijeta, sa 69 osvojenih bodova što predstavlja veliki uspjeh za bh. skijanje.

Sa ukupno 151 osvojenim bodom ove sezone, Muzaferija je zauzela i 54. mjesto u ukupnom poretku Svjetskog kupa za skijašice. Čestitamo Elvedini, treneru, cijelom timu i Skijaškom savezu BiH na sjajnoj sezoni.

ALEKSANDRA SAMARDŽIĆ BRONZANA NA JUDO GRAND PRIX TURNIRU U AUSTRIJI

Na Judo Grand Prix turniru koji se održao u Austriji, bh. predstavnik Aleksandra Samardžić osvojila je bronзанu medalju.

Zahvaljujući postignutom rezultatu, kojim je osvojila dodatnih 350 bodova na ranking listi, Aleksandra je učvrstila svoju poziciju koja vodi na Olimpijske igre u Parizu.

U prvom kolu Aleksandra je bila slobodna, dok je u šesnaestini finala savladala predstavnicu Švicarske i tako se plasirala u osminu finala gdje je bila bolja od predstavnice Portugala. U četvrtfinalu je savladala predstavnicu Australije, međutim u polufinalu ju je zaustavila predstavnik Italije. Ipak, u meču za treće mjesto, Aleksandra je uspjela ostvariti pobjedu nad predstavnicom Poljske i osvojiti bronзанu medalju.



„Ova medalja je jako značajna zato što donosi velike bodove, 350 bodova za svjetsku i olimpijsku rang listu što je svakako veliki korak prema Olimpijskim igrama koje se na ljeto održavaju u Parizu. Svakako bih se zahvalila svima koji me podržavaju, a posebno trenerima prof.dr Branislavu Crnogorcu i Arijani Jahi“, istakla je na kraju Samardžić.

Čestitke Aleksandri, njenom timu i Džudo savezu BiH!

REZULTATI OLIMPIJCA MESUDA PEZERA



Nakon odličnog nastupa početkom marta mjeseca na Svjetskom dvoranskom prvenstvu u Glasgowu i osvojenog devetog mjesta u izuzetno jakoj konkurenciji, bosanskohercegovački olimpijac i bacač kugle je nastavio niz odličnih rezultata.

Mesud Pezer je na Evropskom bacačkom kupu koje je održano u portugalskoj Leiriji, osvojio bronzanu medalju bacivši kuglu na dužinu od 20.58 metara čime je uspješno završio zimsku atletsku sezonu.

Podsjećanja radi, Pezer je u februaru osvojio naslov balkanskog prvaka na Balkanskom dvoranskom prvenstvu u Istanbulu, a lični i bh. dvoranski rekord, koji je do ove sezone iznosio 21.15 metara, nakon šest godina poboljšao je na 21.42 metra, što je novi Državni dvoranski rekord BIH. Lični i bh. rekord na otvorenom je 21.48 metara.

Nakon odlične zimske sezone, Mesud je zauzimao 13. mjesto ranking liste što je dovoljno za Olimpijske igre u Parizu, jer

prvih 33 bacača kugle učestvuje na OI Pariz 2024.

Pezer je rezultatski uspješne nastupe nastavio i u mjesecu aprilu kada je na 16. međunarodnom memorijalnom bacačkom mitingu „Draževina 2024 – Memorijal Nedeljka Burzamovića” koje je održano u Crnoj Gori, bh. reprezentativac i olimpijac osvojio prvo mjesto u seniorskoj konkurenciji, te je ovim nastupom poboljšao lični i nacionalni rekord.

Pored osvojenog prvog mjesta, Mesud je oborio rekord takmičenja koji je iznosio 20.59m.

Prethodne rezultate bh. olimpijca možete pogledati na [ovom linku](#).

Trenutno, Mesud Pezer zauzima 18. mjesto na rang listi, odnosno, nalazi se među bacačima koji konkuriraju za učešće na Olimpijskim igrama Pariz 2024.



TAEKWONDO REPREZENTACIJA BIH DOMINIRALA NA SKOPLJE OPENU G1



Nakon izvanrednog uspjeha juniorske taekwondo reprezentacije Bosne i Hercegovine, koja je osvojila tri zlatne i tri bronzane medalje, bh. seniorski reprezentativci su ponovili isti podvig na Skoplje Open-u G1. Taekwondo reprezentacija BiH je na takmičenju Super G1 u Skoplju nastupila sa 14 takmičarki i takmičara.

Bh. reprezentativci osvojili su pet medalja i to: Nadina Mehmedović - zlato, Amina Hrvat - srebro, Nedžad Husić - srebro, Ada Avdagić - bronza i Džejla Makaš - bronza. Čestitamo svim takmičarkama i takmičarima, trenerima i Taekwondo savezu BiH na ostvarenim rezultatima.

KAPITEN RUKOMETNE REPREZENTACIJE BIH, MIRSAD TERZIĆ SE OPROSTIO OD NACIONALNOG DRESA



Nakon više od dvije decenije provedene u dresu reprezentacije BiH, Mirsad Terzić se oprostio od igranja za nacionalni tim.

Za reprezentaciju Bosne i Hercegovine, odigrao je 175 utakmica, što ga čini apsolutnim rekorderom. Nastupao je na jednom svjetskom i dva evropske prvenstva, a rekorder je i po broju postignutih golova (460). Prvi nastup za reprezentaciju BiH upisao je 14. januara 2001. godine protiv reprezentacije Turske, dok je posljednji nastup za reprezentaciju BiH upisao tačno 23 godine i jedan dan kasnije, odnosno 15. januara ove godine protiv reprezentacije Gruzije.

Terzić je trenutno član Wisle Plock s kojom je osvojio dva kupa Poljske, a prije toga je od 2009. do 2020. godine nosio dres Veszprema. U svojoj dugogodišnjoj bogatoj karijeri, igrao je još za RK Celje, RK Zagreb, RK Izviđač i matični RK Željezničar.

Mirsadu smo zahvalni za sve što je uradio za bh. rukomet i sigurni smo da ovim odlaskom ne završava njegova uloga vezano za reprezentaciju i sport Bosne i Hercegovine.

ISMAIL BARLOV JE PRVAK EVROPE



Paraplivački reprezentativac Bosne i Hercegovine, Ismail Barlov osvojio je zlatnu medalju na Evropskom seniorskom prvenstvu koje se održalo u Portugalu od 21. do 27. aprila.

Trinaestogodišnji reprezentativac Bosne i Hercegovine ostvario je historijski rezultat u Madeiri u disciplini 50m prsno.

Do titule prvaka Evrope i zlatne medalje u finalu, stigao je sa rezultatom 1:01:15.

Ismail je osvojivši zlato na Evropskom seniorskom prvenstvu, još jednom potvrdio vrhunsku klasu i kontinuitet rezultata. Ismail je vlasnik dvije A norme za predstojeće Paraolimpijske igre koje se održavaju u Parizu ovog ljeta.

Olimpijski komitet Bosne i Hercegovine upućuje iskrene čestitke Ismailu Barlovu, trenerima, cijelom timu i Paraolimpijskom komitetu BiH za ostvarene vrhunske rezultate u paraolimpijskom sportu.

TARIK OMERAGIĆ OSVOJIO 16. MJESTO NA SVJETSKOM PRVENSTVU U BRZOM KLIZANJU



Na Svjetskom prvenstvu u brzom klizanju koje je održano u Rotterdamu (Holandija), bh. seniorski reprezentativac Tarik Omeragić je osvojio 16. mjesto u trci na 1500 metara.

Naš reprezentativac je u jakoj konkurenciji sa 58 najboljih brzoklizača svijeta, imao odličan nastup i uspio sa vremenom 2:22.656 ući u polufinale Svjetskog prvenstva.

Iako je polufinalu ostvario vrijeme 2:21.96, Tarik se nažalost nije uspio plasirati u finale Svjetskog prvenstva. Tariku je nedostajalo jedno mjesto za plasman među 15 finalista, te je u konačnom plasmanu zauzeo 16. mjesto.

Iskrene čestitke upućujemo Tariku, njegovom treneru i cijelom timu, kao i Savezu klizačkih sportova Bosne i Hercegovine na ostvarenom rezultatu.

DVIJE ZLATNE MEDALJE ZA BOSNU I HERCEGOVINU U OLIMPIJSKOM DIZANJU TEGOVA



Na MEDITERRANEAN MASTERS & ADAPTIVE WEIGHTLIFTING & INTERNATIONAL OPEN TOURNAMENT – 2024 koje se održalo od 26 - 27. aprila u Durresu (Albanija) bh. predstavnici ostvarili su veliki uspjeh.

U konkurenciji 22 države iz cijelog svijeta, bh. takmičari Nedim Mašić u M55 i Vlatko Buzuk u M60 su osvojili zlatne medalje. Bh. predstavnik, Nedim Mašić je dodatno postavio težine novih svjetskih rekorda u konkurenciji veterana sa invaliditetom (Masters Adaptive). Mašić je u postupku priprema za Svjetsko prvenstvo Master&Adaptive u septembru mjesecu, gdje je siguran u osvajanje zlatne medalje i postavljanje novih svjetskih rekorda.

OK BiH upućuje iskrene čestitke Nedimu Mašiću i Vlatku Buzuku na osvojenim medaljama.

SEJFO ŠHOVIĆ OBORIO SVJETSKI REKORD U POWERLIFT/DEADLIFT DO 75 KILOGRAM



Od 26. februara do 10. marta 2024. godine u američkom gradu Columbus, Ohio, održano je Svjetsko prvenstvo Arnold Classic u dizanju tegova, disciplina powerlift/deadlift.

Prvo mjesto i zlatnu medalju u kategoriji do 75kg, osvojio je naš iskusni takmičar Sejfo Šehović koji je ujedno oborio i svjetski rekord, podigavši 283.5 kg.

Na ovom Svjetskom prvenstvu je učestvovalo 80 zemalja, a Sejfo Šehović je bio jedini predstavnik Bosne i Hercegovine, kao i regiona i Balkana.

Iskrene čestitke upućujemo gospodinu Šehoviću, sa željom da i u budućnosti nema granica u nizanju svojih i naših sportskih uspjeha.

RK "BORAC" JE PRIJE 48 GODINA POSTAO PRVAK EVROPE



Prije 48 godina, 11. aprila 1976. godine, RK "Borac" je ostvario jedan od najznačajnijih uspjeha u historiji bosanskohercegovačkog sporta osvojivši titulu prvaka Evrope.

Rukometaši banjalučkog Borca su u finalu savladali dansku Fredericiju rezultatom 17:15. Do finala su eliminisali čehoslovačku Červenu hviezd, špansku Kalpisu, a u polufinalu moćni Gumersbah iz Njemačke.

Zlatnu generaciju rukometaša, koja je donijela radost navijačima, sa klupe je predvodio trener Pero Janjić, a

dres "Borca" nosili su: Milorad Karalić, Zdravko Rađenović, Nedeljko Vujinović, Abas Arslanagić, Dobrivoje Selec, Momir Golić, Borislav Golić, Nebojša Popović, Miro Bjelić, Rade Unčanin, Slobodan Vukša i Zoran Ravlić.

Foto izvor : [Nezavisne](#)

KK „BOSNA“ JE PRIJE 45 GODINA POSTALA PRVAK EVROPE

Prije 45 godina, 5. aprila 1979. godine, KK „Bosna“ je ostvarila jedan od najvećih uspjeha bh. sporta osvojivši titulu prvaka Evrope.

Popularni "Studenti" su bili prvi košarkaški klub iz bivše države koji se popeo na tron Evrope.

5. aprila 1979. godine u dvorani Palais des Sports u Grenoblu, Bosna je u finalu Kupa evropskih prvaka savladala italijanski Emerson Varese rezultatom 96:93.

Zlatnu generaciju sa klupe predvodio je Bogdan Tanjević, a dres "Bosne" nosili su : Žarko Varajić, Mirza Delibašić, Ratko Radovanović, Sabit Hadžić, Boro Vučević, Predrag Benaček, Ante Đogić, Boško Bosiočić, Nihad Izić, Svetislav Pešić, Dragan Zrno, Sabahudin Bilalović te Almir Dervišbegović i Sulejman Duraković koji nisu bili među 12 igrača u finalnom susretu.

U finalnoj utakmici Žarko Varajić je ubacio 45 poena, dok je Mirza Delibašić Kinđe dodao 30 poena.

Foto izvor: [KK Bosna](#)



EU PROJEKTI

OLIMPIJSKI KOMITET BIH DIO VELIKE MISIJE “CLIMATE ACTION OFFICERS” EUROPSKE UNIJE



U sklopu projekta Erasmus + “OCEAN” kojeg finansira European Commission (EU), koji je predvođen koordinаторom iz Brisela, Europskim olimpijskim komitetima (EOC), u Lozani (Švicarska) u periodu od 19. do 21. marta 2024. godine održani su trodnevni sastanci, pregovori i praktični seminari za EU Climate Change Officers.

Projekat uključuje 19 zemalja, nacionalnih olimpijskih komiteta i instituta, zajedno sa partnerima MOK i ANOK, u borbi protiv posljedica klimatskih promjena. Ovo je više od samog projekta, jer se tiče ne samo uticaja klimatskih promjena na sport, nego i na život generalno.

Predstavljeni su i zanimljivi rezultati dobiveni godišnjim mjerenjem karbonskog otiska NOK-ova od strane partnera “OEKO” Institut - Njemačka.

Sama tematika postaje sve više zanimljiva, te je ovo projekat širokih razmjera koji pored, ne samo edukativnog i praktičnog dijela, ima i važne strateške odrednice koje u potpunosti trebaju da mijenjaju pogled, paradigmu na kompleksnost ove situacije u svakoj državi. Europska komisija nastoji kontinuirano poboljšavati znanja potrebna za kreiranje učinkovitih mjera na terenu.

“OCEAN” tim vjeruje da se zajedničkim snagama, jakim uticajem i spremnošću za promjene možda i mogu ublažiti posljedice i svakodnevni uticaji klimatskih promjena na život običnog čovjeka. Države članice EU-a postigle su dogovor o nizu [klimatskih i energetske strategije](#) i postavile jasne ciljeve.

Bosna i Hercegovina također treba da bude dio ovih strateških koraka, a Olimpijski komitet Bosne i Hercegovine već drugu godinu aktivno strateški radi na promjenama, poboljšavanju i educiranju u ovoj sferi.

ODRŽAN OKRUGLI STO O TEMI UČEŠĆA ŽENA U TOP MENADŽMENTU SPORTSKIH ORGANIZACIJA




U sklopu Erasmus+ projekta Women4Sport koji generalno podstiče rodnu ravnopravnost u rukovodstvu i donošenju odluka u top menadžmentu nacionalnih olimpijskih komiteta u zemljama Zapadnog Balkana promovirajući strukturne promjene u upravljanju, poboljšanju razumijevanja postojećih kulturnih barijera i ohrabrujući NOK-ove da rade sa svojim savezima na stvaranju održivih promjena, održan je okrugli sto 19.04.2024. godine.

Na Okruglom stolu o temi „Uključenost žena u upravljanju i donošenje ključnih odluka unutar sportskih organizacija“ učestvovalo je 50 predstavnika, kako predstavnika olimpijskih komiteta, sportskih organizacija, univerzitetskih profesora, tako i članica

Komisija za ravnopravnost polova pomenutih organizacija.

Sportske organizacije igraju ključnu ulogu u oblikovanju sportske kulture i promicanja jednakosti u sportu. Međutim, u mnogim od ovih organizacija, žene su nedovoljno zastupljene na pozicijama upravljanja i odlučivanja. Na Okruglom stolu je razgovarano o izazovima se kojima se žene suočavaju u postizanju visokih pozicija u sportskim organizacijama, te o načinima povećanja njihove uključenosti koje ćemo primijeniti u daljnjem radu.

Zahvaljujemo se svim učesnicima na podjeljenim iskustvima i datim mišljenjima za bolju identifikaciju učestalih problema sa kojima se susreću sportske organizacije, kao i nositelju aktivnosti Verlab Institutu, na besprijekornoj organizaciji događaja.



ODRŽANA RADIONICA ERASMUS+ “MOGUĆNOSTI U OBLASTI SPORTA”



U prostorijama OK BiH, održana je radionica Erasmus+ “Mogućnosti u oblasti sporta”.

Radionicu je organizovala Nacionalna Erasmus+ kancelarija u BiH (NEO) u saradnji sa Olimpijskim komitetom Bosne i Hercegovine.

Cilj realizovane radionice je promocija Erasmus+ mogućnosti u oblasti sporta, koje su dostupne institucijama i pojedincima iz BiH, uključujući i projekte izgradnje kapaciteta u oblasti sporta i partnerstva za saradnju (KA2).

Radionica je imala interaktivni karakter, što je učesnicima omogućilo da se aktivno uključe u dijalog i steknu praktična iskustva i vještine o tome kako se uključiti u Erasmus+ projekte.





INTERVJU SA...

MESUDOM PEZEROM

OK BiH: Mesude, prije svega iskrene čestitke na postignutim rezultatima u zimskom dijelu sezone, ali i na odličnom početku ljetnog dijela. Na nedavno održanom takmičenju poboljšao si lični, ali i nacionalni rekord u dvorani na 21.42 metra. Kratak komentar na rezultate koje si ostvario u proteklih šest mjeseci...

MESUD PEZER: Hvala Vam na čestitkama. Ova zimska sezona je bila najbolja u mojoj dosadašnjoj karijeri u kojoj sam oborio i državni rekord BiH u dvorani hicem 21.42m. Nažalost, falilo mi je 8cm da ispunim "A" olimpijsku normu. Takođe, imao sam jako puno dobrih takmičenja i rezultata u ovom dijelu sezone poput osvojenog trećeg mjesta (21.11m) u Nordhausenu (Njemačka) i drugog mjesta (20.61m) osvojenog u Luxemburgu. Početak ljetne sezone u Crnoj Gori sam otvorio sa odličnim rezultatom 20.93m, koji mnogo obećava za predstojeća takmičenja.



OK BiH: *Bacanje kugle nije sport koji često imamo priliku pratiti, posebno u našoj državi. Kako si se ti odlučio za ovaj sport i šta je to što ga izdvaja i čini posebnim, u odnosu na druge sportove?*

MP: Bacanje kugle je velika tradicija u kojoj već dugo godina imamo uspješne sportiste. Atletiku sam počeo trenirati 2009. godine i zahvaljujući nastupima naših vrhunskih bacača kugle, Zlatana Saračevića i Hamze Alića, koje sam sa izuzetnom pažnjom pratio, ovaj sport mi se svidio i odlučio sam krenuti tim putem. Ono što bacanje kugle u odnosu na druge sportove izdvaja je to što morate biti ekstremno jaki, eksplozivni i svakodnevno raditi na svojoj tehnici. Nadam se da će i nakon mene neko nastaviti ovu tradiciju.

OK BiH: *Od OI Pariz 2024, dijeli nas nešto manje od dva mjeseca, a ti si na osnovu pozicije na svjetskoj rang listi, već osigurao svoje učešće. Šta očekuješ od ovih Igara i smatraš li da možeš ostvariti rekord svoje karijere baš na OI u Parizu?*

MP: Od OI Pariz dijeli nas samo dva mjeseca. Trenutno sam 15. atletičar u svijetu, a 33 atletičara ide direktno na OI u Pariz. Ostalo mi je samo 8cm da ispunim "A" olimpijsku normu i dat ću sve od sebe da je ispunim u narednom periodu. Dva mjeseca je dug period za bilo kakve prognoze i očekivanja, ali sigurno ću i na ovim OI kao i na prethodnim dati sve od sebe da napravim što bolji rezultat.

OK BiH: *Koliko je zahtjevno biti vrhunski sportista u Bosni i Hercegovini?*

MP: Mnogo je teško biti vrhunski sportista u našoj domovini, jer malo ljudi ima sluha za naš trud, rad i svakodnevna odricanja, a mi to sve radimo kako bi ostvarili što bolji plasman i rezultat na velikim takmičenjima za svoju domovinu Bosnu i Hercegovinu. Nadam se da će se to sve jednog dana isplatiti i da podrška u budućnosti neće izostajati.

OK BiH: *Koja je tvoja poruka mladim sportistima u Bosni i Hercegovini?*

MP: Poruka mladim sportistima u Bosni i Hercegovini je da vjeruju u svoje snove i da budu uporni u onome što rade i uspjeh će na kraju sigurno doći.



ZAVIRITE U DRUŠTVENE MREŽE OK BiH (klikom na sliku)


🏆 Prof. dr Branislav Crnogorac dobitnik priznanja "Orden zasluge" za razvoj evropskog juda i BiH juda... See more



Liked by nikola_boxing and 55 others
olimpijski_komitet_bih 🔥 Dijeli nas 100 dana do početka Olimpijskih igara #Paris2024 ! ... more



Liked by darkosavic91 and 56 others
olimpijski_komitet_bih 🗣️ Održan sastanak između HIFA-PETROL d.o.o. i Olimpijskog komitet... more




TOP sponzori Međunarodnog olimpijskog komiteta



Olimpijski komitet
Bosne i Hercegovine

💡 Radionica je imala interaktivni karakter, što je učesnicima omogućilo da se aktivno uključe u dijalog i steknu praktična iskustva i vještine o tome kako se uključiti Erasmus+ projekte.



Pratite nas na društvenim mrežama:
(klikom na ikone)



©2024. Olimpijski komitet Bosne i Hercegovine.
Sva prava zadržana.
www.okbih.ba

Specijalnu zahvalnost dugujemo sponzorima i partnerima OK BiH.
Klikom na logo posjetite njihove oficijelne stranice.



Moja priča.

